


序

樂全集

五十六



樂全堂集卷之五目錄

序

奉送趙同知歸

西湖

序

送黃雲峯之任序

奉送李叅判航海朝天序

送李相禮宣慰

使倭

序

奉送李判書朝天序

送張副察出鎮

西

序

送都元帥張公出師序

奉送李舅氏全州府尹序

送閔監司出按

西

序

奉送李舅氏歸洪陽序

送吳驪州之任序

奉送金清陰航海

天

序

送鄭副學出守金堤郡序



送韓叅判朝天序

送洪監司出按嶺南序

送金羅州序

贈朴尚之出按海西序

贈義賢序

贈希安序

贈雙乞序

贈守能上人序

卷之六

序

壽李母金夫人序

壽人序

南坡沈公壽序

貞敬夫人申氏八十歲壽序

李叅贊壽序

李判書壽序

內兄李正七十一歲壽序



貞敬夫人申氏壽序  
列聖御製集序

宗儀讌會  
宣醞契屏序

宗親府有司堂上先生案序

雲谷集序  
清虛堂集序

戴恩堂詩集序  
奉先品節序

平山申氏姓譜序  
楓巖集序

疑禮問解序  
己卯諸賢傳序

東岳集序  
柳先生集序

公源先生遺稿序  
五峯別集序

經世書補編序  
菴菴稿序

成謹甫集序

疑禮問解序

韓山李氏族譜序

畸菴稿序

龜谷集序

...

...

...

...

...

...

...

...

...

...

...

...

...

...



樂全堂集卷之五


序

奉送趙同知

存性

歸湖西序

不佞聖夙失所傳而墜家聲與學士大夫趨舍異塗  
雖尊執長德之門不敢執鞭非故倨也以丙午秋始  
候門館拜先生於牀下其觀感於辭氣之間者亦足  
以去浮躁暴慢之習退而攷德於前修蓋西京醇行  
之君子為近之云暨先生遭譴或寄旅於郊關之外  
或卜居於江潭之上蓋不遑其處也不佞策款段出  
郭時從先生飲徃徃畧去少長之禮極言竭論竟日





忘歸一日先生以湖外之行語不佞曰吾老矣且首  
粉榆之丘以樂餘生子其文之不佞拜而受之次其  
平生誦義於先生者為之言曰事君犯而無隱事親  
色而無違子豈服其訓宗黨化其德朋友信其節吏  
民懷其惠者行之成而才之達也先生一出以言事  
不合而絀之可謂無隱矣事太夫人終其世備極志  
物之宜可謂無違矣閨門之內肅如朝廷子豈服其  
訓矣姻戚之間翕然無異言宗黨化其德矣斷金之  
利白首不衰交誼之信也盤錯之剗口碑不刊任職  
之能也為數者當世之士能雅言之余觀古之人抱



才與能久孤於世不能無涉世之汚若太史公所記  
是已降及秦漢之際楊惲歌種豆而自及殷浩返空  
函而終廢其德不之以掩其才則處於患難之中不  
免有躁競誹怨之色已先生坐無妄之災削跡淪落  
六年所矣妻亡而不及見子病而不得護其窘苦撼  
關可以動於中者多矣先生能辨乎榮辱之境確乎  
其操墮乎其順志氣益壯精神益王遇客輒引甌苦  
舉太白擊鮮市脯歡適自如此尤大人之量也噫世  
事日以非矣巖穴滿而都邑空豈天地閉大道隱者  
耶湖中即先生之故鄉也田園之樂宗族之盛溪山

之勝樽俎之會娛視聽悅心意者與江潭行吟之地不可同日以言矣而先生世臣也一落湖海之濱終南清渭渺然千里外也戀闕思君之誠憂時悼道之懷自有不能已者則先生所以惓惓於茲行而徵不佞文喻寓深矣否泰之運倚伏無端翕闢之機通變無常數其往也者而知其來也者聖人觀易之事先生之往也其不遠復矣不佞聖人也身陷負國之罪日竢投荒之典一辭堂陛君親遠矣于先生之行而實有慷慨而不釋然者三歎而書之云爾

送黃雲峯一皓之任序



余觀士之平居慷慨談論世道則稱三代論學問  
則稱鄒魯其自期不數數然矣或一出而為世用則  
趨向日下施措日踈終至於侈名敗身而已焉何則  
士處窮則操心危慮患深其所論議激而發之槩以  
仁義而質有剛柔識有博約當大事而心離志變迷  
於見理怵於得失利方斲廉脂韋於世此所謂差以  
毫釐謬則千里者也為世用者不可不知也內以公  
卿外而守宰何莫非庸也吏之為道奉上而近民  
之休戚而吏之賢不肖亦聞於上矣上之褒誅行而  
勸戒存焉是以古有循吏墨吏姦吏酷吏之稱奸與



墨士之羞也。彌酷吏摧豪擊猾，聲生威張，一切取名譽於當時者，向之慷慨談論者，能之而循吏則不然。無赫赫之聲，而有實惠去浮滯之蠹，而秉至公其治效去而思也，久而存也。非服習儒雅，專尚仁義者，鮮能之。故今之為吏者，上績至緋玉者多矣。究其跡而徵其實，則循良之稱，蔑蔑乎無其人矣。噫！世道墜矣，民散久矣。方圓無辨，勸戒無徵，馴致于邦本搖而隔并臻矣。吏之賢不肖，顧不重歟？語曰：不肖亂治，賢者治亂。今聖上舉黃君於韋布之間，遽寄百里之命。君亦感激知遇，拜命不辭，欲以其所學勤民為報稱。

之地蓋識乎君臣相與之際者矣君之行我知之剗  
以有制廉而不劇識量清通濟以慈良其操之以填  
物其才足以剗繁以此臨民其不為循且良也乎政  
成治舉仁聞日彰則姦者懼墨者祛酷者寬一方之  
民亦且賴之余於是乎賀 聖上之知人而黃君之  
受知遇也君之聲烈余且翹首而俟之

奉送李叅判

顯英

航海朝天序

蓋壬辰倭難士大夫奔命靡監家大人祗役中外翊  
聖從尊執南郭朴公學南郭公愛畜之無間翊聖亦  
執子冢禮事南郭公而益習南郭公內外屬長幼者



得拜公於其門公於南郭公為堂從而實與家大人  
契甚以是公視翊聖尤篤云丁酉倭再逞全家辟地  
於鐵瓮是時南郭公為通判李公為評事奉其太公  
以處之難故也翊聖從太公請業而公口授為尤多  
翊聖以事南郭公之禮事公父子者二十年餘矣其  
間禪序萬變太公逝矣南郭公病矣而翊聖不佞負  
戾自廢絕造請久間從公侍驩輒道故各厭意而顧  
公已種種矣以世故滋多謫名高自修者咸數化否  
即跋躓公能不夷不惠超然無累所謂既明且哲者  
非耶公通籍迨三十年由太常循資躋下大夫之列

無何受命朝京師先時使者多厄於風濤薦紳士  
人人自免凡三易而卒歸公人莫不危畏其行翊聖  
為往叩之公怡然無幾微色終日侃侃如也翊聖不  
敢以一辭為解退而益服公雅量也夫平居而超然  
無累者公之操確也履危而怡然不色者公之志果  
也志果而操確於行藏乎何有於是人又莫不誦其  
義上尤嘉獎特加秩又以手批擢少司寇以遣之公  
將行徵文于翊聖臨行之贐即相講以懇切之義此  
可為敵以下者翊聖於公焉用辭倣筭今天下之搢  
腕談者舉以天下輕重在我責我以十七八其言不



以義則以恩至掉激也噫此猶其名而不揣其實徒  
知腹背之喻也奴酋得遠廣為用直趣仰攻疑我之  
議後也東首反噬懼師之出關也其重固若在我而  
我之不足重者亦較然矣壬辰席二百年昇平之業  
悉國之賦齊楚敵也卒當倭兵不交而烏獸竄迫於  
龍灣掃二千餘里之地束手與敵只畫策赴訴而已  
雖以中國之威調十萬衆委輸倍之暴師六七年然  
後始克有定亦不能專以兵力勝也今之論兵者難  
倭而易虜此知倭難而不知虜不易也嘉靖間倭躡  
閩浙千里騷然輓用戚大將軍繼光以一旅擣而覆



之若承蜩然萬曆初虜梗西北趣召大將軍以備虜  
虜輒引去終大將軍在西北不南牧焉壬辰以後諸  
將之東征者其法大抵皆用大將軍新書大將軍固  
近世善用兵者也然其言虜視倭難者五必寬文法  
假便宜簡裨將三十人發遣邊郡材官十萬器械糗  
糧皆仰給縣官又加訓養三年而後方議戰賭勝大  
將軍所當特驅水草竊發小者掠金帛人畜大者毀  
城穴墻意飽去爾其難猶如此若奴稔兇久畜志鉅  
此可以策勝不可與嬰鋒可以持久不可與決驟使  
大將軍當之必期以十年二十年和衆而動籌全而



發也曩為帥者輕用其衆以天下之勇銳頓於虎口  
盡之一舉而使天下之勢十去四五又失全遼則其  
勢數倍夫以我之全盛不能當大將軍所易者貽中  
國之憂暴師六七年而屋屋復疆土今以敬不支之  
邦當天下難制之賊謂可以操其勝負十七八者與  
大將軍畫策何如也我之尚君臣父子襟裾焉者實  
先皇帝再造力也苟可以利中國則當以社稷從固  
不待談者之口而若不勝匹夫之忿昧經遠之蓄決  
憑河之怒暴前而折卒不可支吾奴蓋無東顧之虞  
專於攻闡天下事去矣為中國計莫若令我示重不



小發蓋備關內而得如大將軍者設法制奇蓄銳  
於中操百勝之道靜而竢之奴進退失首不數年而  
自困我承其弊首尾齊舉奴必不暇要領而成我擒  
矣公之入朝也執政之為天下大計者若詢公而責  
之試以大將軍之畫策者進而徐以我之形便提衡  
之則安知無如大將軍者複複然出而深相喻也合  
則為天下之利而不合之以哲我之忠恪而去讒賊  
於朝廷矣然後訪海岱結軫之士覲鄒魯文物之  
會以為嚮用之地則公家牧老之大節不墜於地而  
禮義之進於中國者光前烈矣馮夷海若亦且屏氛



翳而先後之矣翊聖當頰首而仔之云爾

送李相禮敏求宣慰倭使序

子時以宣慰倭使往也授簡於翊聖曰必以文之若  
所知者若不自盡矣求於人之文之也子時莞爾曰  
第次我與若少壯相慕以敦世好者文之為不以  
文之也世好我與若所同敦也少壯相慕亦所同情  
也奚足以文之哉且也同於我與若者而文之我與  
若皆已知之矣不同於我與若者而文之我與若皆  
不知之矣同於我者而文之我知之而若不能知之  
同於若者而文之若知之而我不能知之奚足以文



之何謂同於我與若者夫仁義之性存養之節我與若所同稟而同勉者也何謂不同於我與若也反經而背義徇己而濟慾我與若所不同道而同去者也何謂同於我也屬託肺腑之列俯仰禁掖之間狗馬聲色之娛園池樽俎之樂此同於我而不同於若也何謂不同於若也端拱而趨歛衽而談一言半辭輕重於儒林之雅長篇短什黼黻于國家之盛此同於若而不同於我也何謂所知者不自盡噫君之復也道與德尚矣姑論其次三場之捷綸誥之任不可謂不華矣悼屈於用文也入相禮儀出專儼伴不可謂



不庸矣而稱戾於遭時也此必有其知與才不蘄盡而不自盡也芻豢人所甘也子時藜藿文繡人所羨也子時布素高明之室人所求也子時庠宇車馬之飾人所快也子時卑羸所官者冗所儉者夷子時之嗜好胡與人殊也歟謂之索隱者近僻謂之行怪者近名若夫用行含藏時中之事子於三者何居子時之行我知之矣知有君父不憚險而行知有職事不擇位而處意有所快忘其羸也身有所安忘其庠也體適而忘衣也口適而忘味也子時之知內也非外其才又足以稱之遇小則小遇大則大所不自盡者



將致其盡焉顧不及汲於盡者是謂難所謂實若虛  
有若無者非耶子時之宣慰倭使也特舉以錯之爾  
其行也有以支離辭者妄也叙我與若相與之語以  
文之

奉送李判書

廷龜

朝天序

蓋癸丑之獄自鄉大夫暨衿裾之士縲絏下理者日  
數十人以次放逐即得白出如月沙李公者亦廢而  
弗庸丙辰冬上特起之使上國事竣上嘉悅褒錫戊  
午之禍元臣碩士長笏論竄而公之席藁待命于外  
者二年所矣于是時也奴酋犯順師徒敗績執我將

卒賚以求成中朝臺閣之臣疑我貳奴間於天子我  
聖上聞而震惕若曰非李某華國之手不能辨之其  
特起之釋罪與秩敷奏天朝公乃感激強起受命人  
有難公之行著余曰公於是役奚其難奚其難夫為  
人臣者得君則幹事得君非難以不失其正為難幹  
事非難以不失其道為難以才致庸以德致位公之  
所以得君也殫力悉心辨國厚誣公之所以幹事也  
然此外也非內何以觀公之志盡公之迹乎圭組  
非榮徽墨非辱公之志然也身可辱道不可絀公之  
操然也其得之也正其失之也亦未嘗不正故榮無



所欣辱無所戚所謂能辨乎榮辱之境者非耶噫公  
忠誠內植和文外著在廷為儒臣之宗出疆稱使乎  
之賢精虔其心被除其神昭明物則格于四聰公於  
是役奚其難奚其難忠者仁之符也誠者理之恒也  
和者誼之通也文者質之用也公能以是四德得於  
吾君屢廢屢起其不可以得於吾君之道行于天子  
之廷也耶公於是役奚其難奚其難遂記是語奉贐  
月沙李公陳奏使之行

送張副察晚出鎮西邊序

公當兩帥降敵之後承天下不支之日膺推轂之寄

司萬衆之命出鎮關外而又有胡書之恐我賫我賊  
之至我境且朝夕矣 朝廷倚公為重士民倚公為  
生公之任厥惟重哉任既重則憂亦隨之人有為公  
慮者余獨曰公亦何思何慮夫天下之事形與勢而  
已形有安危勢有利鈍居安蓄必危之形秉利受必  
鈍之勢將相之敗名失身恒於是忠烈之殉名致身  
亦恒於是故二者智者不謀策士不載善為相者審  
國家安危之幾以成其治善為將者揣時變利鈍之  
際以成其績何謂必危之形君狃久安之樂相習嬖  
媮之態法網內壞而不立軍令外弛而不振上下相



冒朝野異論如此者必危何謂必鈍之勢 廟堂昧  
深遠之苗疆域無兵革之災州郡事推剝藩鎮便名  
譽介士解體刀劍不利如此者必鈍何謂安危之幾  
國家內救隣敵外侮君相懷恐懼之心士民奮敵愾  
之勇士於是時謀敵必行施措必效匹夫之言重於  
九鼎也何謂利鈍之際敵雖大不壓於境國雖敵不  
底於潰卒可鍊以為用穀可收以為積士憤全師之  
新降將有覆轍之可鑑所謂將軍有必死之氣士卒  
無逃生之心者也賢者量己而知人能者援古而證  
今以今國勢論之可以委安危之幾利鈍之際也亦



可謂將相任用集事之秋也公亦何思何慮然浮滯  
之蠹何以去之功實之士何以舉之瘡痍何以撫之  
驕情何以服之不服驕情則軍政乖不撫瘡痍則士  
無勸功實未盡舉則用舍不公浮滯不盡去則權力  
易撓此任事之忌而行事之害也是雖公之所當察  
識而行之者而亦公之所不能獨運者也公能察識  
而行之則公亦何思何慮惟公處國家安危之幾攬  
時變利鈍之際又得朝廷之倚重士民之屬望翕  
闢進退實惟尸之於是四者公亦何思何慮焉公於  
緩帶之暇默識而求其道則幾矣



送都元帥張公

晚

出師序

代家君作

吾東方北接鞬羯西連女直南通倭古稱四面受敵  
三國固戰國而逮麗金元侵軼無寧歲倭亦累警徼  
聖祖基命直洪武二十五載高皇帝開闢混一天  
地履端之會云列聖恪於侯度虜解辮奉約束倭  
梯航貢琛域內謐蒞且二百年則國家不知兵而亦  
無所事兵矣掌故數我朝受服者魚公有治尹公弼  
商數人而品餼錫賚上卿押之猶以殷聞魚公所當  
特癘疥耳大者用師數萬少者半之位寄不過制一  
方而利鈍不之為國家重也壬辰之難元帥權公慄



始統八路可謂重矣捨攘之際禮數不備只分符耳  
而先皇帝以天下兵力壓之督師若大司馬提師  
若大將軍監護給事耳目之臣贊畫郎署帷幄之士  
而編裨材官無慮千萬計寇雖搗我實敵大國權公  
元戎乎被驅使以陪隸莫敢自逞而後是李公恒福  
韓公浚謙長笏開府責在綏靖亡論師徒之盛管轄  
止數省焉倭難已天下稍稍息戈甲者十二年而  
先王棄群臣又十二年而先皇帝棄天下奴酋梗  
化奄有全遼女直之遺也通於我而實間貢道其勢  
扼吭而拊我背也寔欲射天嵩偏下邦我師往而不



返豎子役於讐庭矣而輸我虛實則中外蓋惴惴矣  
運祚丁否大經攸斁 聖上掃盪兇孽邦命維新母  
子之倫紊而復叙君臣之義習而復章誅其臣弔其  
民者所以昭先業也敵王之愾禦其侮者所以光先  
烈也乃蘇于民詠于衆求可以司三軍而威敵國者  
昇專閩咸曰判中樞府事張晚實 先王心膂之臣  
試于民民安試于師師睦且寬而有容必濟大事特  
以手批授晚八道兵馬水軍都元帥視師西關選吉  
祭禡 上祇祓齊盛躬 御郊壇以送之臣晚張牙  
建鼓劔佩以出玉節在前金鉞副之以軍禮見 上

舉手揖之 上降等而受之解所 御寶劍授臣晚  
曰不用 命者以此從事臣晚陞而受揖而退群臣  
之拱而侍者噲然而覲禁旅之環而立者駭然而視  
都人士之觀者嘖嘖異之曰元帥何人禮抗 至尊  
也元帥所部將吏忻然而詫之曰吾將軍不拜 至  
尊也禮率 命酌飫及介士分曹較技錫與惟豐於  
是臣晚百拜稽首益加祇畏將吏以下匍匐而進噲  
然覲者愉乎其色也駭然視者降乎其心也嘖嘖者  
感以慨也欣欣者莊以屬也申欽以冢宰侍 上左  
右與之周旋而官實太史肆紀其事而序之曰出師



之儀載邦典者倣三古國家之大事以也典禮徒存  
二百年而未嘗舉焉掌故數以殷者其猶為殺張公  
之所遘即國朝二百年而未嘗舉之禮也豈不盛哉  
雖然二百年而未舉者可見國家之不知兵而亦無  
所事兵矣豈非 聖祖基命宏廓承 高皇帝履端  
之化而得全全昌者耶是以能不知兵而無所事兵  
矣國家與 皇明旣為父子之國而理亂之徵終始  
同符以今日天下之勢言之則 聖上更始之業能  
為天下重也哲矣 聖上屈至尊之體降等而禮之  
舉二百年未嘗舉之儀侈之者豈為張公設也我國



衛中國而為東翰乎成敗之數固不之動中國一髮  
而舉天下之兵力而壓之至勞大司馬大將軍使我  
之元戎莫敢自逞焉則先皇帝為屬國遍受其敵  
也我東人之食息襟裾焉者度德量恩果歸之誰也  
天下之力困於小醜遠廣為羶裘之場天子日宵  
旰矣甘心款奴陰與之計者彼誠何心哉毛將軍以  
一旅寄於海陬勢至孤也能禁其不軌上以壯中國  
之威中以鼓東人之心下以掣奴賊之尾者豈不誠  
大丈夫哉自我聖上踐祚權藉我國益大則深識  
聖上大有為之志為中國遍受其敵也張公之任實



肩天下之重矣此可以觀時運盛衰之際幾往來報  
施之道矣噫虜解辮奉約束倭撈航貢琛以俟度通  
中國者此一時也語曰賢者治亂不肖者亂治以張  
公之能受 聖明推轂之重其所部雖介馬之士皆  
奮滅此朝食之義則用夫二之組係而俘焉郊迎飲  
至禮當率初夫是之兆

奉送李舅氏全州府尹序

贈言朋友道也在子第行宜不敢贊一辭而公特頒  
與以進之凡有行役輒徵文字萬曆癸卯公始魁多  
士明年朝京師翊聖序其行以勉其操焉粵三年乙



已公左遷高山驛丞翊聖序其行以悼其屈焉又幾  
年公以尚書郎出視西原篆西原即外王父清江公  
遺化之地翊聖述世德以勗之公遷海上橐平日朋  
儕間往來篇什為卷者翊聖書其後而竊悲其意焉  
翊聖前後論著公事凡四而公之行歲畧可槩已記  
翊聖序朝天行時生十七歲矣公僅三十三公壯矣  
而果於行翊聖稚矣而蒙於識矣異轍音然不可謂  
不見志矣噫今翊聖無似駸駸乎四十之年矣備經  
災苦粗辨乎榮辱之境而公之髮亦皓矣居然有人  
代之感而聚散亦無窮期矣為尹完山徵文之令猶



昔邇聖不可以眇言逞技將信其辭而無諱可乎公  
於世固寡合矣知公者量乎國不能十之五彌知公  
者或稱其剛直或稱其介潔不知者曰剛直近於小  
恩介潔似乎違俗毋論不知知之之以盡公乎哉公  
處則陽浮慕之出輒畏忌使公不得安於朝自釋湖  
節浮誇盈車而屋一敬曹而又不免一麾出矣公從  
駕疾馳無毫幾微見則人稱其雅量而公之意何知  
外內君所使命也何知善惡盡其力職也修吾職以  
聞君命分也唯知天下有大分而已一切進退毀譽  
何足以嬰其中乎邇聖嘗竊頌公矣公實愷悌人也

處已接物和平仁愛唯不能俯仰中窺而有特立不  
撓不可奪之節其操清其行勇其道直古之直者必  
稱史魚勇者必稱仲由清者必稱伯夷此三君子者  
俱百世師也猶不能無偏當時有知不知者何恨於  
公之不見知於世者十之五也古人曰上世無是非  
中世有是非而無好惡下世是非亡而好惡作視今  
之世果如何也完山東南一大都會也民俗慳狡而  
仰機利丈夫倡優作奸女子鳴琴瑟跕屣游媚土豪  
逋賦而訕其長上緩之則慢急之則仇其勢甚難制  
也以公直道當好惡之世理難制之邑聲烈不能無



得失而不能無得失者所以見公之不苟合而所至  
澤究下戶匹婦無不父母之矣翊聖質公之行如此  
不欲喻其五之不知亦不欲喻五之知之也伯牙得  
一子期而奚多乎哉

送閔監司

聖徵

出按關西序

士祥長吾六歲歲丁酉遇士祥於文城士祥年十六  
余纔十歲同寢食共起居者殆閱月可謂韶黓友也  
時士祥孤貧寄養於堂村何啻弱喪觀其貌小丈夫  
爾觀其行已有定嚮知讀書無躁容時露英氣可以  
頽脫不數年聲名藉甚又數年而發軔則先輩長者

器使於盤錯士祥蓋自勵為精白勤於職事又數年  
而稱良墨綬又數年而稱良刺史遍為湖嶺元弼摧  
豪擊猾有趙京兆韓馮翊之風云世所難莫過於槎  
使士祥既受命則怡然無幾微色視溟洋如康莊  
蓋信其不辭難也不辭難則於天下事何憂不克余  
知士祥止斯而已士祥受委於西門徵余言為贖西  
門重地也昔以鴨綠為限今以清川為限所感者幾  
百里也清川不支則沮江為關防沮江抱山負江地  
澶漫俗尚末利丈夫迷書不通婦女鳴琴跼蹐冶遊  
偷淫非用武之地也遠有強金近有猾劉不知士祥



何以敵遠近之敵固西門之重也耶余聞諸侯有道  
守在四境不守鴨綠而以清川為限者何意耶自清  
川至鴨綠方五百里土沃而民富可謂天府之國也  
壬辰之難乘輿播遷八方丘墟而穆陵用此五百  
里之地贍大將軍十萬之餉基三百恢復之苗國家  
棄是地如脫敍屣豈廟堂石畫出人意表尋常萬  
萬耶余所言者即利害說也亦有以大義規焉棄  
祖宗舊業何如是容易耶洛陽賈生當漢文時以不  
能答中行為流涕痛哭使生於今當作何如懷也士  
祥今日得死所也若稽本朝金公宗瑞遇知於

英廟披草萊設六鎮六鎮北接靺鞨其俗大抵獷悍  
我心默性一朝約束則固已眈眈伺影矣於是金公  
不知死所矣披草萊設六鎮者乃闢他界為我有固  
不易收吾赤子復吾土地視金公所為難乎苟哉余  
觀士祥精勤敏達類陶士行而忠蓋過之先輩長者  
之器使者未必知士祥當敵西門之重而亦不可謂  
無鑑也士祥視溟洋如康莊視清川以西如溟洋耶  
士祥雖然少丈夫爾目中已無強金與猾劉焉韶戲  
小友知士祥乎否哉噫士為知己者死事不辭難不  
在槎使而在西門士祥乎勉之哉



奉送李舅氏歸洪陽之行序

舅氏潛窩公凡有行必問序於翊聖翊聖輒應之輒  
問輒應非以文知也然前後序公行不受命出疆  
即治民事爾今公之行乞休沐歸致期有程時月間  
別也又惡乎序也公之言曰吾病且倦矣幸得休沐  
請歸非有不得已者則不能遽起也翊聖嘗世而徵  
者也君子之畸於亂世不畸於治世茲恒理也昔賢  
之畸於治世者指或多屈治世而畸則長畸已耳若  
是過於人耶過於世也不能無疑焉矧公之行而竊  
有所幾也固不敢過公亦不敢過於世也公之志堅



公之行篤公之操貞其德不能出入其身不能俯仰  
生平素履皆實際也觀公之所與游者蓋不甚多而  
或慕公之名或躡公之躅不之以知公之心者也試  
以公質於世世無不交口賢公雖仇敵不得不賢公  
也而從以伺賢公者之心非畏公即憚公也以交口  
賢公者而觀之則公果畸於世耶以畏而憚之者而  
觀之則公果不畸於世耶以公而推之昔賢之畸於  
治世無之怪焉若是而可以過於公耶過於世耶噫  
後世非無治日之人非無彌賢者也先王之道不行  
久矣俗習日趣於下文之以決科筭行之以修邊幅



辯之以解機括智之以辯利害此世所稱一切名士也其德不能不入其身不能不俯仰素履皆非實際公安得不長畸於世也耶公之立朝殆三十年位躋列卿官叙部省不可謂不達矣亦不獲一日安于朝則令後之人考公之跡亦猶翊聖之疑于昔賢也漢之二疏知之者也百世艷其行而今之人何渠不及於古人勢有所不同跡有所不便營役沒身者何限無論公之鬚髮盡白少公十七八年者亦已種種矣世道日益難干戈日相尋僕僕塵白生樂鮮矣一丘一壑又安可期也使公安於田里非有不得已而

起則幸矣承公之教肆言無諱非知於公而疇於世者耶

送吳驪州翻之任序

不佞早叨貴近不敢與學士大夫游里中數子以世誼相徵遂論當世修辭者稱肅羽其人肅羽既通籍奔命四方則尤以政事才見不佞心慕之幾一見也居無何上改玉妙遴經幄之士而湖堂之選自祖宗朝已重之主文盟者尸甄拔之柄榮以登瀛時先大夫實提衡而去孰之以國望得十學士而肅羽與焉不佞語于心曰肅羽何人不以世之清濁而特



聞如是哉未幾肅羽遂大顯陟給諫論思間出為專  
對方伯皆當慎簡所至譽望藉甚不佞竊讀其辭命  
聲詩者果不負其名也者又從以覘其政事才猷者  
不負其職也者然後信其為全才也暨余遭大故纍  
然持斬肅羽來哭甚悲則不負其所知己也者不佞  
於是益信其為君子人也未幾肅羽亦以憂去三更  
穀穉各以外除而相選則不佞病殆不支肅羽亦將  
甚握手勞苦相悲憐已不佞復塞堦竇謝絕人事且  
半歲矣一日肅羽損長牋速不佞文曰吾將出宰黃  
驪矣不佞憮然久之肅羽宜內而不宜外况當國家



多事補拾闕遺之是急肅羽而外則誰當是任者徐而究之肅羽之宰外郡為養也則即聖上孝理之推也然黃驢去京師不遠而通其民彫鮮其俗貧弱懦者之以治之肅羽之往也雍容坐堂皇不煩一令可以稱文無害也則吾惡乎贈肅羽一言按地志驢即先后鄉而英陵在焉所以稱牧優於三輔而奉祀體統頗尊江山佳麗甲於國中登觀之美有清心樓塔縫之雄有神勒寺勝國牧隱之遺蹟尚在詞人墨客徃徃倚棹於蘆洲沙嶼之間徘徊沈思竟日忘返其民彫鮮懷保之不易其俗貧弱厚撫之宜先拜



聖王之陵則想像治理攬棲居之勝則先憂而後樂  
先正之遐躅真僧之逸軌有足以起我發我者多矣  
非如庸羽者不足以稱其地也余於是知朝廷之  
以庸羽宰黃驢者不但為養也庸羽不小黃驢不卑  
州牧厚蓄薄發致其富有日新之業竣其報政入而  
羽儀黼黻於以賁世道則不但負其名而上可以不  
負主恩下可以不負知己之知者也

奉送金清陰

尚憲

航海朝天序

不佞聖在田間時與二三兄弟竊竊論當世之君子  
以公為鑑水以公為衡石以公為砭藥以公為塩梅



國其庶幾哉無何公入佐天官秉論思且長御史矣  
與昔竊竊論之者若契左符然公亦殫忠盡節知無  
不言言無不竭論者猶謂公居是職而績止是耶公  
殫忠盡節知無不言言無不竭而國論未靖國事不  
理豈任有所不專聽有所未至耶公且不得久安於  
朝也公果朝拜疏而夕出門矣士咸惜之海使之命  
又下士惜之不暇而駭矚相視言不敢出於口也噫  
夫是奚病於公哉公嘗屢躡屣起而道自高而名愈  
盛也使公守官任職奉令惟謹持祿偷安進退循人  
則朝廷之上若是者固不鮮矣利器試之盤錯逸



蹄騁乎峻坂聖人宰物必先概其難三代歷試蓋可  
見矣今之受委莫難於聘上國而專對也毛帥寄於  
我而貳我遠民寓於我而虐我貢途旣隔大海蜚語  
不翅簧鼓此數者不深長思而處之則不亶為吾東  
方失得實天下安危之機也 上之使公非故斥公  
而賢公也公誠實之以動人才猷之以重國貞操雅  
量之以範物而幹事則今之聘上國而專對果屬之  
誰哉 上之歷試公者所存深也聞公海使之 命  
惜之不暇駭矚相視言不敢出於口者其見小也竢  
公竣事而還必膺升巖廊調鼎萬展夫抱負於平素



則國其庶幾哉不佞聖於公為通家子也辱與之進  
授簡徵文敢次所嘗揚扃者為之序

送鄭副學

弘溟

出守金堤郡序

壬辰之難先大夫從事於先相國幕府周旋戎行實  
有知遇之感未幾相國下世而事迺大謬機穽一設  
擊排交下先大夫首嬰其鋒被擠控關者久其間舐  
啖噓喻逞憾修郤株連波及酷於鈎黨強者畜縮悞  
者吳化諱言相國姓名者殆三十年矣相國之子姓  
皆賢而自甘放廢淪落田間子容從沙溪金先生遊  
頗講學飭躬又工古文詞一日抵洛求見余驩然相



得不翅平生之舊出其著畸庵稿者讀之其為賦  
誄如騷選為文章根於兩京而出入昌黎氏者為多  
詩道沈雄間發豪語居然一大家也擁篲苦相屬忼  
慨譚論神思慙溢泠然埃壒之表不知其身之躓於  
坎窞也攷其言行謹密如處子恬淡如戒釋精思博  
識非餘子所可得以知也鼎革之初選擢清峻望實  
之隆無出其右而顧迺逡巡避口不談當世事僑  
居荒落日引散人漫客鼎坐敲棊市脯沽醪猶不厭  
也且善病故求外補得湖之教郡凡知子容而送子  
容而贈以言者夥矣其為言必不一以余之訥將何



辭而送子容乎然家世相知可謂深矣余亦過從數  
年粗窺其際矣子容經歷崎嶇觀物之情藏盡機鋒  
脫去綵績惟其所養宏厚確然不變者存乎中則人  
望而嚴之嚴之不能無基此豈獨子容蓋古之如子  
容者亦然噫以子容之基酒自遣不談世事官不過  
丞郎之列而不得不逡巡避有如此者身為大臣  
肩荷重寄上紆主眷下係民望進退不得自由而  
隱然傍伺含沙中影則惡得免於罟罟而善化者之  
落石無足怪也子容之髮已種種矣曷可以骯髒之  
七尺僕僕米鹽間久餉五斗為哉長孺閑閤之以養



重治郡少倦尋理舊業畝書靜暇玩索微奧期以日  
新富有為桑榆之獲俯仰之間妙契疾書出以贊  
王猷處以開群蒙紹師門之緒副士友之望則子容  
之於此安知不有使之然者耶子容乎勗之

送韓叅判仁及朝天序

余觀世之司進退者自謂核名實尺寸不遺其氣勢  
又可以榮辱人而其所榮者果皆賢耶其所辱者果  
皆不賢耶賢不賢強名而榮辱為實際也推移嬗變  
倚伏無端近乎方生之說也余曰是而嘗有慨乎元  
之之出處元之頎然其軀儼然其儀文藻斐然筆翰



爛然早譽蜚英盛之玉堂人咸艷稱爲真學士而亦無不以其宰相器矣中罹舊故絀閑淪落者餘一紀此猶之乎胥溺不獨爲元之之榮辱而改紀興廢拔茅彙征元之之仕途若將大闢而淹滯不振又數年所則寧有司進退核名實能榮辱人者而不免失其尺寸者耶雖然元之能庸其才自致列鄉躡躋京尹吾知司進退者固不勝於司命者矣儲貳請封之典國之重事必擇大夫之才且賢者而遣之元之遂膺是命攝右丞相以行可謂榮矣然論元之之賢不賢則固自若也余蓋信蒙叟之言不凝滯於物也或



虞元之之行涉風濤也。歷徼警也。憲網之少密也。余以為是三者益於元之之身多矣。天風海濤龍騰鯨作。壯吾觀一也。儲胥星羅刀斗不絕。厲吾志二也。嚴約束恪憲令。飭吾操三也。以其頎然修其儼然。奮其爛然之筆。載其蜚然之文。與中朝薦紳先生相周旋焉。則中朝之人不亶以學士稱之。亦將以真宰相目之矣。余於是知所謂榮辱者不在人矣。元之乎行矣哉。有司命者存。

送洪監司

命考

出按嶺南序

國家數十年而南西替。受兵禍域內殆無完土。專命



分憂治而安劑而調紀綱一方者在監司所以筭才  
譖而劇易則淺之虞目前者舉元老於西率以畀南  
蓋沈幾庸重日月之明也西中虜猶有南恃視昔之  
南中倭根本於西以支吾焉而南難之已賴帝東  
顧力不翅泰山今有蚍蜉援我惟南不但為西土根  
本實為國家根本根本拔而將奚措焉此元老之不  
西而南而任即大而責隨鉅云嶺之賦分要脊而二  
之上者關度支下者需容幣委輸不同則病于民鄉  
曲之豪儒服跣行大而挾官令小而暴編匹浸成不  
馴則梗于化是猶流弊為理而不可并者徵發與字



撫以有腹敗之徵夷館於我悉我虛實安知不耽耽  
伺釁龍蛇之警可懲也亡論本末難易之勢較然矣  
則沈幾庸重畀元老而南也古語曰知臣者君不亦  
盛矣乎元老余少友也而房畜之已自童孺美秀而  
文期以朝夕於貴顯者果以弱齡取甲第若拾芥際  
昏卷懷彌見其操選會輩英望實俱隆佐天官而衡  
尺中權魁庭製而宿儒退舍為諉才地見節於箕城  
之役卒與主將甘於同敗則有烈士風當和戰之議  
抗義封疏凜乎有不可犯之色劈畫利害鑿鑿中窺  
綽然有經世之畧人主動色廊廟吐舌大任大責不

卷之五

二十一

得不歸之元老矣元老之世邈矣名德襲媿至益城  
公而益大文學勲庸冠冕一時粗發為政事類古鄭  
僑德譽過之施於南徼尚騰口碑尊先大夫曾涖海  
平著循良聲元老之一麾安東負神明稱而祖而父  
而子而宦于是邦幸不墮聲而克紹厥媿則為希覲  
焉南民俟元老久矣民之所俟澤若易究然槩蓋城  
公之績非惟精神聰察抉摘之能也必其德浹而信  
孚使久而不能忘也噫世道之艱民生之困弊端之  
滋習俗之厲視益城公時不啻倍蓰上之任元老  
視宣廟任益城公亦有間矣元老懋乃心乃力十



倍於益城公方見功焉豈不大可懼哉不敢知元老  
之為政治之將安之劑之將調之治其梗於治者安  
也劑其病於劑者調也治而安劑而調而紀綱所由  
立也元老乎是在培而壅之務厚國家根本為不拔  
基而副我 聖明知也

送金羅州 尚密 序

噫推其所愛而愛齊焉推其所敬而敬同焉曰其所  
推者而申其情焉每從公源清陰兩先生於競秀爭  
流之地李公琅然其辭侃然其儀周旋其間愷悌君  
子人也且其第宅鼎峙境落昭曠夏拔於埃壘而居



然盡菑中也不幸公源先生致其節清陰公去其位  
又其子姪落落星散楓溪之水石無主北里之門徑  
蕭然蓋由世道之一變也李公嘗訪不佞於淮上篝  
燈一宿撫事感慨愴怛髣髴殆難為狀噫逝者已矣  
存者不可復見耶存者任其齟齬逝者亦被訾警耶  
用平生愛敬之心為死生決裂之痛烏得不一言一  
淚也俄而季公從里居起家牧錦城往也固求拙語  
為贖夫以愷悌之資得於家庭者稔矣自小邑以至  
大州聲烈茂異為入主所簡拔則何敢贅一辭為也  
第湖南為國之根本錦城為湖南之根本公之為任



實肩一國之重矣知其為任之重而為其所可以為  
重者然後緩急之畜庶幾有賴而不隕其家聲矣噫  
嬪變無窮凋謝已盡追惟疇曩之迹奈無申情之地  
於公行殊有忼慨而不釋然者也噫

贈朴尚之選出按海西序

余少時見退之思元賓而不見見元賓之所與語疑  
其過於傷也既閱歷世故方覺斯言之非過也余生  
年逾半百與余年齊者漸就凋喪况長余數年者乎  
孰之長余數年而居以鄰情好莫逆俱喜酒余得酒  
未嘗不與孰之飲蓋愛其有酒德然其所慕悅而徵



逐者亦豈但在于酒也與之周旋餘十年而孰之作  
官兩西不相聚者又十年矣其自海西而歸余為置  
酒要與飲飲量不小減其膚澤而髮未宣且得能官  
聲藉藉喜其將需于世也未幾寢疾不起余操文哭  
之以洩悲焉噫知舊死者何限而有時悼念必思孰  
之見其躬尚之如見孰之不以其年革后先而為差  
焉則尤有感於退之之言也孰之年位未究而死焉  
則尚之之代輿報施之道也孰之曾以管餉久駐西  
土仍為州牧流惠不斲西民間尚之出按必思孰之  
之政而延頸而係之矣尚之之任視孰之輕重大懸



其澤及人淺深亦有可言者矣余愛就之移其愛於  
尚之尚之之往不做以他辭其亦悲矣

贈義賢序

大雄氏之教遍於天下殆與儒道行而其言似是而  
非其行似高而卑似是故亂真似高故自尊自尊故  
驕而無上亂真故混而難辨驟而觀之令人可喜徐  
而究之卒無實也下士然之中士疑之上士闢之世  
無上士其徒肆然無忌設法於山林南畝之民化其  
身而舍其財奔走供給不啻若期會則其精神力量  
亦有大過人者矣歷代稱佛稱祖者固無論已以余



所聞觀言之西山與虛應論法異同棄歸遂為宗師  
其後松雲以任事顯於國家浮休以說經顯於山門  
此一時也松雲之笈曰應祥浮休之笈曰覺性方並  
據南北各占門戶此亦一時也余與覺性有雅誼以  
一二事叩之蓋亦深通內典能以似是之說緣飾其  
道才辨之以自雄所謂精神力量有大過人者矣覺  
性上之笈子名曰義賢者從余遊一日謂余盍以數  
行文字識從遊之好余莞爾曰若能知余乎哉余居  
處華爵祿厚子孫滿前猶托契於空門引自尊之人  
聞似是之說昵而無間余豈有求於若哉草衣蔬食



棄父母兄弟與世絕而猶款余扉與余談論之間往  
往為余所闢而不知止焉若豈有求於余哉余知若  
道之亂真而不能拒若若知余之闢焉而不能絕余  
余與若其果真知而實踐者耶抑若與余其果妄識  
而枉馳者耶余姑置之真妄之境而惟余與若目擊  
而心孚者必有所契焉者即所契者而求其所以契  
之者則幾矣若以此說歸以質諸祥性兩老師或能  
知之云爾

贈希安序

今之以詩執牛耳者無過於東嶽先生先生雅喜韻



釋釋子之游其門者甚多而工詩若筆亦無過於安  
公其詩道吾不知所師法法東嶽者也其筆意吾不  
知所師法法雪菴者也天資清踈穎拔無俗態蓋亦  
叢林之秀云袖中東嶽詩以懷素惠休擬之非過獎  
也久住南漢山徃徃訪余終日相對無躁容無擇言  
無論其詩若筆其人固可愛而亦可教也詩若筆雖  
工技也非道道非爾所欲耶余未聞爾所謂道亦知  
吾所謂道也吾之所謂道非若爾之以虛寂為宗即  
事即物皆有此道理詩若筆踈小技者亦道理中一  
事也聞道成則通於技未聞技成而入於道也以爾



之清踈穎拔之資求諸道而實用力焉則其成就豈止於技而已哉廢渠之吟嘆焚渠之筆研垂簾塞兌內視反聽止水湛湛纖芥不滓則爾有成師而無所事於技爾將弁髦東嶽雪菴之業而棄之爾試以此說質諸東嶽老先生先生必有以教之

贈雙仵序

樂全子病卧芙蓉館有一衲子叩門而請見許進之前仍以言難之曰佛何人也道何道也佛之橫目縱鼻與人同也道獨異乎人哉道在於心固不異於人也以其同者言之則吾之虛明即佛之心也以其異

者言之則佛而棄世我而在世在世而能葆虛明吾  
何異乎佛也爾棄世而不能葆虛明爾豈同乎佛也  
樂全子十二通禁籍被紫拖金今三十有三年矣子  
姓滿前姬妾擁座五色五味之悅耳目者多而吾未  
嘗動吾心汨吾性爾少從名師游名山無子姓姬妾  
五色五味動心性悅耳目者而或有頑空不悟冥行  
迷路若是而言之在世者能知道乎棄世者能知道  
乎此善謔不足厭棄世者之心吾所以卑佛氏之道  
者道在於心則師吾心而已宮室衣服山林城市皆  
外物也必去爾之髮緇爾之服甚至去父母兄弟與



鳥獸草木同群而後修其道者何也衲子喏不能應  
遂書其言而貽之山中如有難是說者以俟後日來  
復

贈守能上人序

山人守能訪余於淮上一衲一錫動止不凡問能文  
字乎曰不能已進一部書請余勒題題罷願姑置之  
遂忽辭歸余發其書見之撫華嚴要語為一書名之  
以禮懺其規矩繩墨縝密圓轉非老於結撰者不能  
為也且觀其所為緒餘者把弄三教睥睨古今抑揚  
揮霍風發霆擊余於是知能也果非凡品余平生喜

卷之三

三十一

與山人衲子游山人衲子稍有知識亦輒來叅世所  
稱老宿名師義瑩法堅性淨應祥海眼覺性彥機皆  
余所素雅也無論其歸寂以在世者言之祥之德器  
眼之才識性之警發機之雅操皆不負其名若淨師  
禪門之高蹈不止名可名而已然或謹於戒律或傳  
其師說未有把弄三教抑揚揮霍如能也者能也欲  
以區區之見欲抗朱夫子定論肆然不知愧懼惜乎  
陷溺之甚也然此其見之小也志則固不凡也不幸  
不入乎此而入乎彼也若幸而入乎此則從朱氏之  
門攻彼之短必大有力焉夫道之真偽不難辨也道



原于天聖人則之天若可違則已天不可違則道一而已天下之人抱才與器淪溺於似是之說肆然不知愧懼者幾許多也渠家火宅之喻真自道也余病廢田間閉門習靜嘗愛釋氏一段淨名處與山人衲子不能無酬酢語而蘇子瞻所謂爾姑妄言之吾以妄聽之者也能也既非凡品或能感悟於言下故攄所蘊余於能也雖曰一見契則深也





樂全堂集卷之六

序

壽李母金夫人序

吾表兄直長李公重基氏自龍門策羸而西謂翊聖  
曰不佞曾用金吾之役當推恩封賜十年而未舉也  
則懼孤上恩而吾母登七袞矣欲丐錫命之典以侈  
之曰當榮而辭于厥躬云况公所愛者日耶直長公  
瞿然而作以格請奉 教旨李重基父某 贈通政  
大夫承政院都承旨兼 經筵叅贊官春秋館修撰  
官藝文館直提學尚瑞院正母金氏封淑夫人者直

長公拜稽首受執而泣曰藐諸孤不肖不足以備驅使在上者至紀纖芥勞榮施所生恩至渥也乃與其季進士厚基氏消吉治具為太夫人壽綏聖宜以一醕周旋於外氏宗人之後而地遠而僻不得與百拜之列遂詮綏聖平生聞於家庭若所自識知者為叙佐舉萬歲之觴曰吾母夫人之夫第也恒言夫人入門而先議政公大悅之既又執婦道則深加敬重不衣冠不見也夫人與承旨公相莊不盥櫛不待也逮遘巨創袞毀之誠不強而至哭擗之節不勉而中槁然慘沮忘其生者迨一紀而猶得全此天相吾季氏



存其孤默延其世者非人力也暨二孤長成得佳婦  
稍自慰而操履之貞四十年如一日尤不為一切激  
行而近名也吾舅氏潛窩公曰夫人毋論飾孰能談  
古實說成敗是非較然無戾可謂女士也吾家大人  
亦亟稱之曰金夫人古之淵女也翊聖自七八歲時  
從直長公兄笏遊稍壯徵逐無間竊矚夫人質行多  
於群子笏云夫人三十而失所天仍遭議政公喪夫  
人實尸李氏四代之祀而嗣子纔十三次十歲夫人  
置二孤於膝下撫而誨之其間事議政公夫人克承  
其歡噫噫戚哉夫物而舅亦逝矣則仍兩世絕焉保



其孤存其祀為母道也育而教之亦猶乎父道也具  
甘毳奉老姑為婦道也能養其志亦猶乎子道也以  
眇然任四者之責不能不強起理秉以加聲色而稀  
糜敬裳纍若不支絕撫訶之音而綜理微密中更窳  
難遷次流離而蒸嘗之儀無廢舊觀常稱未亡人人  
亦不敢褻以華侈入其室者祛其奢恭之色噫閭巷  
之婦殺身以殉者烈矣嬰之存趙孤不至為杵臼死  
而夫人之得全果若吾母之言天扶相之春秋今六  
十有九矣起居七箸如四五十時而向之二孤蒼然  
稱翁於子舍諸孫俱以文行顯小者頭角嶄嶄而竟



膺真封之誥物則俱章用亢李氏之宗而卓絕之操  
貞淵之懿方且闡揚於世用昭二南之風則受報於  
天若挈左券與殺身以殉一時之名者何如也於是  
而夫人之報承旨公者亦博矣然螽斯之羽振振者  
族大椿之萼千歲為春頌聲之作此為開先翊聖當  
恭竣夫人之宅期頤大年而鞠跽於登懸秩席之間  
以畢其釐云爾

壽人序

蓋邦興百年至龢厖蒸至中廟而拂士登庸治法  
大備若某先生與靜庵趙先生倡明格致之學贊襄



雜熙之化中途俱被景射一時賢大夫士盡之文罔  
服齋先生與靜庵其德最盛而禍最酷君子悲之云  
宣廟鼎革先生之道復明於世而先生之寃白矣先  
生有孫即今相國在布素已負聲藉甚舉進士入經  
幄宣廟重之公亦居貴近斤斤不以擊拂小節見  
淺之為知不能無間間公不數數為態色宣廟益  
器之晉秉統均遂宅大揆時據公上者陰持斗柄竊  
運寒暑公無所激履脫退矣又十年所而當子訪落  
公再入為元輔而時事大變志士之為深遠喞者揣  
其難掉公屹然於巖廊之上進不喜退不戚日提衡



獄情必傳生議內盡忠告之義外絕訐諤之風數年  
間以公而得不死者不數而公亦不使之覺也有以  
諫官之忤當途者韋布而論國是者有以疏語無諱  
當論法者皆下清室燎原之火不可嚮通而公於無  
諱者之讞為顯揀之言至諄復能回天意得當次律  
則歸美於上於諫官韋布之獄不欲為辨論以彰朝  
廷之失而曲加扶持終公在相位無所問而公去韋  
布擊死諫官者錮之海島然此猶為匹夫之生死不  
足為國家存亡之大數也丁戌間事蓋難言之矣矢  
書之變作中外洵然日中見沫明有所蔽而生人之



類殆將盡矣公持重不動毫髮上促召入切責頃刻  
更僕公以微言款之冀上悟而知不可奈何則肩輿  
出都門止乎東瀛始露章質之以身竟開氛蒙照之  
以大明禍竇遂窒公迺感激起視事俄而亂賊之謀  
張而論議橫生欲以不測之威偽定一時之是非則  
從違之際人鬼判矣含靈鼎沸無所底止而咸仰公  
之為公首發据經之義以遏滔天之勢一以為指南  
一以為榘鵠公於是時知有社稷不知有其身而  
亂賊之眈眈視公甘心於公者何所不至而為寢  
其議貸公死止北邙矣三年而賜環復袂仍為宗臣



而亂賊之徒竟以逆節伏誅懸首於藁街體解四方  
於是乎天道昭昭而奸宄有所懲矣粵二年而壬戌  
為公降周甲之歲十二月二日寔公覽揆之辰公家  
督宮學君徵嫺於辭者為公壽而謂翊聖曰不可以  
不勉翊聖非知言者也其文又不足以賁飾揄揚而  
竊有感于君臣之際而知公仁壽之徵則曷敢疑于  
哢哢者而不為章章之說為公頌乎公侍 宣廟專  
任吳德而同乎上矣則以一體不貳心而得之也公  
之再入也與世未殺不專任以吳德遇大事則益泄  
其機示其不同所謂追先帝之知遇報之於陛下者



公志然矣而上顧同其不同湔拂而出之罟罟之中  
位遇無改此履蓋之量而亦惟孤誠朴忠默乎而致  
恭履正之士陰有所恃而安環東土襟裾焉者咸受  
仁壽之賜則豈非公仁壽之徵也耶公雅喜挫銳和  
光之旨守以淵冲不宰之功離埃壘而僊僊乎遊方  
之外致柔如嬰兒則非公仁壽之徵也耶公於大化  
聚若海而費若涔不凝滯於萬物之宗則大椿之美  
茲為一籌易曰積善之家必有余慶公能食服齋先  
生之善而膺其慶者非耶吾君之注吾民之望蓋急  
公且不免強起以廣仁壽之賜而從今往十年二十



年而公始登大袞國家舉袒割之典問政於膠序之間橋門之外引領而觀公仁壽之祥者以酌斗祈者之詩而祝之則翊聖當從諸門下之末以畢其說

南坡沈公悅壽序

吾東方畫八區畿封在中其實七也西北塞土嶺以東民物彫鮮無顯仕者兩南稱人材府庫而大姓世祿者自勝國改籍而家京師鄉曲之士仕宦登朝者以京師不能十之二三而其中誦俊傑才能以去孰重輕者蓋亡幾焉京師子弟席父兄緒業生於斯長於斯無論事君任職者衣縫掖處寒窶守佔畢終身



而不能出郭郭一步而振其業自是邦俗抑亦風氣  
使之然歟是以士大夫束髮登本朝至老死不去  
或以肩重或以懷祿肩重者不得去懷祿者不能去  
其勢雖殊不去均也德靖以來告年致事者蘇退休  
世讓鄭贊成宗榮僅數公而非世家京師者也引年  
丐休者掌故絕書久矣大司徒沈公一朝請急謝機  
務讓祿賜卜居于江郊扁其堂曰盍歸顏其軒曰止  
之闔戶自靖不通賓客而不侵聖以通家之誼得拜  
牀下其容清羸其神甚王其境牢騷其意甚得泊焉  
嗒焉不叩不應徃徃抨擢諳委典章論國體則曠之



音也談世務則丁之族也處江湖猶廊廟伴漁釣若  
縉紳所謂惟所處而安者其得於易之謙者為多云  
公之世逖而華青城疇庸裕后安孝開邦以祥而亘  
而延至忠惠而蓋大族蕃且貴公之仲父青陽公以  
鄧竇之親負士林重望先大司馬公先國後家世稱  
忠朴太夫人稱孫於靖陵門闈烏赫富貴尊榮公  
生於其家夙負雋才聲華藹蔚游乎賢闈不露厓角  
如李子堅之不知為邨之子也識者已器重之弱冠  
釋褐蜚英省署皂囊一封姦宄氣死遂秉銓軸望實  
愈孚時際宣廟重恢之治方講民事公乃以政術



顯杖節而出隱然當人主心膂之寄苟羨早譽不  
獨擅於前代矣朝廷虞北公則北虞西公則西席  
不暇暖而時事已大謬矣改玉之初公入贊黃扉  
判淮地部預機政資廟謨紆主眷而得物情而變  
變如畏卒能超然於物表遂其撝謙之志昔之蘇鄭  
二公告老而退人猶難之以為美譚况公年貌未全  
衰而果於去朝朝之聽公去奚以哉公之志已決視  
赫世之業軒冕之榮不翅脫屣則世莫得以櫻之耶  
以公觀之出處在人不在地曙矣公立朝餘四紀歷  
事累朝人之視公為大耄高年而考其春秋距懸車



之期尚饒五載矣十一月十三日即公懸弧之夕公  
之嗣熙世氏具酒食以饗之不佞聖從席次起奉觴  
稱壽退而叙公之跡頌其壽徵也夫生於天地之間  
宥於氣機之中脩短信絀皆有定數而一羸一輪較  
若左券有其才而用不盡則壽之徵也負其能而位  
不滿則壽之徵也不竭其精力則壽之徵也天道蓋  
謙地道流謙鬼神福謙孰違乎盈虛孰戾乎動靜受  
虛而能靜於公之志見之矣盍歸所以守虛也止之  
所以孰靜也公昔盈矣今以虛公昔動矣今以靜夫  
好盈則天必虛之好動則天必靜之靜於不欲靜虛



於不欲虛則天安得虧之地安得變之而受福於鬼神而為壽徵也公之文藝少致力焉則足以華國見以為技公之筆翰屢登金石為世所珍而欲辭其名並廢其書用才可謂不盡也公之明識英猷足以經國澤民而歛而歸之於爭隈爭席之地得位可謂不滿也不盡其才不滿其位騏驥之程未千里而止焉則精力固未竭也此三者非仁壽之徵也耶大椿之美始為一籌從今往為期為頤以膺黃耇之章而國家修執珎問政之禮則不佞聖當從門牆張喙而申其說焉



貞敬夫人申氏八十歲壽序

榮川守朴侯濠氏謂翊聖曰吾母今年登八袞矣吾兄弟將脩爵為壽子其以一言侈之翊聖拱而復曰微侯之徵固將祝之禮曰婦人之行不出梱門內之親不可以貌其榮門外之黨不得以撫其實惟翊聖服訓於先生之門執子弟禮事先生數十年矣則能頌夫人之懿也翊聖自毀鬻挾冊請業於先生退與榮川君游先生視之猶榮川君夫人視之亦猶乎先生之視之也遂與榮川君出入無間日在先生之側忘其非其家焉節於斯殮於斯或竟日忘歸或累日



焉則夫人至手擲髦結衣帶以拊之久而人之視之  
不知其非其家兒也時先生之兩尊人俱無恙而於  
先后為諸父行通籍掖庭諸子姪堂從昌顯於世門  
闡鼎盛光彌收族戚踈無差履屐恒滿戶外輪蹄充  
于里閭而長公先逝矣則先生實攝幹蠱夫人佐之  
入其門者怡怡然無異色出其門者熙熙然無異辭  
咸歸美於先生與夫人矣先生既出膺仕婁淮雄藩  
悉著冰蘖聲娘尊齊體育子女嫁娘壺政益莊而職  
共以相無攸遂焉則觀德者并媿之洎乎嬪變之節  
始翕然稱之滎川君起家為名郡縣以贍其養季全



州倅佐大府遞奉魚軒來徃有焯仲都憲公用才諳  
侍上左右任以心膂時出而巡檢三南暇則便途省  
覲擁節旌奔走數省大吏赫赫榮耀此之謂移孝於  
忠以諸子賢且貴而馳封於上騰頌於下世為希覲  
焉古之善祝莫盛於華封嚮用之徵于箕範人有壽  
而不能富者矣有壽且富而不能多子者矣三者具  
而有身不康寧者矣壽而無祿窮也無子獨也身不  
康寧則憂也四者缺一不可謂福履之全也或得其  
全而無可致之道而致之幸而非恒是以序五以攸  
好德為重夫人之佐先生為德者緊舉其凡而翊聖



竊有所矚矣稟賦之純不做修為幾乎無競無我匪  
害其天集其祥也噫夫人視里中兒猶其兒視其兒  
猶里中兒使人不能辨是特一事而推是心也所謂  
民吾同胞物吾與者也諸子亦能觀感於斯其為治  
俱以無競無我為心使老者養其生少者遂其生夫  
人之德不出於梱而其施不已博哉使人父母養其  
生則夫人宜得壽矣使人子房遂其生則夫人之子  
孫宜蕃且庶矣老者少者各安其業治理流聞則夫  
人之諸子祿位不替而藏富於國廩矣牲鼎錯珍七  
箸漸健五官不衰神用日王載以康寧綏為諸福祝



堯錫武之言已為夫人躬履之實用雖有善祝又何  
以加焉唯以漆園之大椿為笑王母之蟠桃為壽係  
之以詩詩曰

秩秩初筵 抑抑其儀 酌此壽爵 孝子承之

何以祝斯 維彼靈椿 八千為秋 八千為春

右大椿之什

秩秩初筵 温温其德 酌此壽爵 康之以色

爛其盈眸 金母之桃 百拜以釐 三光後凋

右蟠桃之什

李叅贊德洞壽序



崇禎乙亥竹泉李公用年位入春老社在列咸賀不  
佞宜效一言之祝而觀公符彩煥發神用精利如四  
五十歲人能以筋力事君治六官贊黃扉則不敢  
遽為康釐之辭過是六七寒暑始微示倦引疾簡出  
有告老之意噫以公望實步武巖廊而遂將脫屣已  
乎是欲歛其不盡之祿所謂不違則也竊聞公少負  
奇氣倜儻不羈稍壯折節謹勅務為躬行肫肫如也  
洎釋褐踐顯路見朝著群分相訾訾乃謂為王臣任  
王職盡王事而已何知彼此默運機衡期於無迹知  
與不知皆稱長者癸亥鬯華之日以納言方在



闕下植立不屈聲氣甚厲左右欲兵之猶不動有論  
以義舉然後始乃歸 命忼慨籲告請全舊君言淚  
俱發出於至誠觀者為之動色 上亦感其義而嘉  
獎之退而上章掾當辟者君子與其有友道云人於  
是知公有烈士行其德不專以長者也蓋天賦奇氣  
秋毫不發者六十年發於當發之地不顧死生利害  
則可謂善養者矣比來世故滋多薄俗尚口而公不  
為質言覈論外若無所辨別而叩其中則鑑水靡差  
噫若公者固未易窺其際也要之和而有制恒而不  
變獲天之結終之以尊光者也豈不盛哉公與先大



夫生同年矣又同案矣不佞每入公門執子房禮孤  
露餘生悲纏風木公即不鄙夷之以為知我許與不  
淺猥述所嘗知之者以頌之恭竢薦珎問政之日當  
復形之聲詩以張之云

李判書

溟壽序

余嘗世而徵者也數十年來世道嬗變人心隨化於  
數化之中求終始不化者蓋無幾矣噫禍莫慘於癸  
丑變莫大於戊午士之樹頽頽伸眉抗言者舉靡然  
而化元臣碩士之所爭亦塵塵廢論亡敢為根極之  
說而今大司徒李公方在玉堂獨不叅殺永昌之議



引退亦異未幾公之石友鄭東溪蘊上書叫永昌寃  
語涉不諱上下震駭霆霹交轟絃以徽墨錮之海島  
齟公者謂公風東溪而發之事將弗測而毅然不撓  
終無悔色放竄流離隨遇而安雖以元臣碩士任網  
常之重者至論其出處之際不得不少遜於公則數  
十年間當世道之變終始不化者唯公一人耳余於  
當時慕公之節誦公之義而未嘗識公之面竊揣其  
力量氣魄有大過人者 改玉之後始辱公知公果  
沈雄魁傑人也豐貌偉軀望之儼然杖國之年五官  
益利飲啗如少年每遇余輒引滿而浮之恨相知之



晚也則其胤太僕公徵余一言為公壽蓋公以年位入春老社已數年所而覽揆之辰在建寅之月云余作而復曰從古善祝莫過於華封三語而公所自有箕疇嚮五好德居一無是德雖有諸福不之以為福唯無窮者其唯令聞也余畧公諸福之祥以平生誦公者修不腆之辭以壽公可乎筭觀 聖明之注意公彌重公之酬報之期尚遠不暇以自逸昔衛武公九十而匪懈詩人媿之余且以嘗世而徵者勗公以世道之責祝公以壽民之術太僕公起拜以謝遂次其語為之序



內兄李正七十一歲壽序

桃李之華先於衆卉瓊葩瑤蓋過風雨而無迹松栢  
之茂寸積尺累磊柯錯節飽霜雪而後凋輪贏之理  
宜無間於物與人也是以遲發晚成允為祥壽之徵  
余以是道求之於世唯吾內兄習靜翁行藏殆庶幾  
焉蓋翁生於法家惇孝悌而負氣槩嶷嶷有立其遊  
太學也風裁峻整棘棘直遂士景附之傾一時譽髦  
華問藹鬱謂曉夕發軔中更昏穢坐廢挫闕餘十年  
所則雖遘嘉會故倦於公車退然自靖而不免於薦  
剡強起為郡縣所淮績奏遂躋大府仕路稍闢矣而



翁蹈止之之戒告年致事浩然賦歸君子高其節朝  
廷授以右秩俾優游閑局子姪輩日朝翁所者拖金  
紫束衿紳輝映門闈親黨士友咸尊事之鄉大夫入  
翁門必啓新執子弟禮以見翁亦酬酢造請弗愆常  
度持冲履謙頗有和光同塵之趣絕不以事物嬰心  
寓興於花竹琴書怡然自適人於是蓋歛其德而豔  
其福以為希覲焉中秋日即翁弘辰冢嗣亞使與季  
中書君治壽爵宿賓以娛之酒間余從賓客後起拜  
揚觶而曰翊聖於翁少弟也猶能記翁游黌舍致士  
之盛其諸肩翁而隨者或以才地或以官業馳驟焜



耀於當世者何限而凋喪委塵聲沈影滅藐然亡徵  
翁獨七十康強嚮用未艾實符蚤華晏茂之喻也而  
處困而亨遇坎而止制剝而致柔養厚而施晝凡為  
德之以獲天之祐者夥矣豈可專歸諸適然之輪贏  
也耶惟後凋之姿磊柯之節真有類乎松栢當享喬  
松之壽為瑞於人間世矣客曰子能觀物而知人善  
喻於理矣此可以為翁壽詩以頌之在諸公

貞敬夫人申氏壽序

朴都憲潢氏泣謂余曰不肖獲脫虎狼之口歸見慈  
母於笄澍完山任所方伯以上命致餼幣張筵而



饗之於是不肖兄弟遍奉萬年之觴老母乃大愉進  
潢於膝下煦濡拊摩而稱上恩謂未亡人今日方  
知為母之貴顯親之榮也於是不肖兄弟感激於  
君寵母恩不覺涕洟之交頤凡預席次者無不聳賀  
以為盛事云身脫虎口至幸也母子相聚至樂也錫  
賚便藩至榮也茲不可以不識翊聖蹶然於言下而  
作曰此雖君一家一人事之以觀天道焉君之所遘  
古今之至變也能自靖而終復于常者祇以慈與孝  
而致之非有他術也初老從上于難已亡其躬矣  
洎畫策出城人胥褫魄而能不變者唯君一人耳朝



廷揀赴瀋賓從多以親老為解時太夫人春秋垂八  
袞矣君獨審于取舍如赴樂地太夫人聞而怡然曰  
吾兒盡其職耳吾善也箸母念也人於是誦君移孝  
之為忠太夫人勸忠之為慈也其再赴瀋禍端甚厲  
君尤自辨與石室翁共處雪窖終始周旋不失其操  
彼拘西徼更淹數年則太夫人尊齡踰八望九矣君  
之兄弟之侍左右者憇傷其意終不敢露其實而太  
夫人已察知之中自隱而絕幾微若未之覺者而于  
君之歸始乃伸其至情煦濡拊摩亟稱上恩於讌  
賚之日其教迪之懿識量之宏即丈夫之所難能而



載籍之所希覲也如不忍一時區區之慈發於色辭  
則徐庶之方寸亂矣安得不變而成其忠也噫若固  
不變太夫人未嘗變矣不變者服人之心未嘗變者  
合天之道有是母宜有是子夫所謂至幸至樂至榮  
者非以他術而致之雖一家一人事之以觀天道焉  
易曰天之所佑吉無不利又曰積善之家必有余慶  
朴氏之慶其未艾也肆頌言天人之徵慈孝之祥上  
以為太夫人壽下貽其子姓俾識世德如此云

列聖御製集序

自夫子刪書載明良之詩漢唐以來為臣子者各自



賢其代莫不集而傳之。皇明御製集頒行于世固  
日星揭也。本朝獨闕焉不脩。王子義昌君芻搜  
極索得。列聖御製詩章及手札若干編。宣廟宸  
翰為尤多合成一編。徵細聖紀其顛末。細聖謹拜而  
受。跽而讀已。又惕而作曰。洋洋乎大哉。泐泐乎盛哉。  
欲贊之辭。摹天畫日。非愚則妄也。恭惟聖祖戎衣  
基命。而膺藻昭。回臣居正。已頒之信乎。聖無不周者  
也。列聖紹述。學懋緝熙。綸音浚汗。直叅典訓。大風  
瓠子。固不之道也。本朝康理二百年。而未遑於裒  
撰。誠有憾於文獻之徵。義昌乃能掇拾於散落之餘。



克有完秩文不墜地娘媿虞薰其用心之勤可謂曰  
至而亦可謂孝思不匱者也臣少蒙 宣廟拂拭之  
恩親承提誨寵頒寶墨不翅若家人父子而未效秦  
良之殉徒抱不忘之悲攬卷興懷恍若對越遂啜泣  
而書之云爾

宗儀謙會 宣醞契屏序

不佞徵于否恭而嘗世者也否而恭者雖若在天而  
其所以致之者實係夫人修典悖而已其修之必先  
于修睦悖之反此噫豈敢長言哉惟我 聖上既靖  
內難起義昌君琬龜川君晬于畧辟之中復其位而



崇其秩俾攝諸宗人二君起視事錄宗人之曾綰府  
事者姓名為表屬不佞叙之荆府廡于舊址又屬不  
佞紀之蓋侈 上恩述職事而實體修睦之 至意  
也庚午秋 上引宗親儀賓之從 上于甲子丁卯  
之難者若而人于萬象樓下宴賚之至 御手執爵  
而侑之在位者咸感激涕出不知死所翌日義昌率  
諸宗人上箋稱謝已諗于諸宗人曰嘗聞帝堯之世  
九族既睦乎章百姓我 聖上之於九族親愛之至  
也黎民尚亦有利哉遂約束諸宗人曰惟我宗人皆  
祖宗遺體與國家同休戚者也豈惟國家休戚之與



同宗人之憂樂亦可以卜國家之休戚試觀今日憂  
乎樂乎且也二百年宗盟之廢宇不幸為烟塵者四  
十年而重新於此時抑亦天意也迺消吉于辛未四  
月某甲置酒于宗親府新廡會宗人若儀賓修大同  
宴故事上聞而嘉悅遣內侍吳大邦賫法醞御  
厨饗人治膳賜樂一等禮官視懸不違顏咫尺其  
禮莊矣於是內侍執爵稱上命宣飲義昌以下一  
百有八人以次受爵訖義昌修爵爵內侍禮也諸宗  
人肅躬屏氣終日酬酢罔敢有誼譁失儀者法譙既  
卒折俎繼陳始乃畧去苛禮分曹舉白舞蹈擊節絲



肉相宣不知夜漏之已三鼓矣義昌令樂人各執其  
技導之以出燈燭交輝綺羅競妍醺和盞繫結為春  
融都人士夾路而觀者嘖嘖謂熙朝盛事云諸宗人  
以為大同之會在萬曆庚寅距今四十有二禩可謂  
希覲况際中興叨此異數不可使湮沒無傳遂  
作軸以畚之微不佞載其事噫宗室法不得與政任  
職徒廩祿章服奉朝請已則其憂樂似若無所關於  
國家治亂而修恃之徵較若左券斯曷故焉聖人之  
政由家而國而天下則莫先於治親天理當然之則  
也祖宗之土地民庶吾得以有之以祖宗之土



地民庶之所賦出者與祖宗之子孫共享富貴者  
斯聖人親親之意也是以講家人之禮推肺腑之寄  
序昭穆之懿稱盤石之宗隱然為國家根本雖不與  
政任職其憂樂關國家治亂與一朝委質功見事舉  
者輕重為如何哉我聖上敦睦之誼弗假毫髮修  
為而祇循天理當然之則也嗚呼盛哉敢以徵于否  
泰而嘗世者頌盛美而勗宗人者如此

宗親府有司堂上先生案序

宗法昉自熙古備於周官至漢大封同姓子弟體統  
亞於乘輿猶置宗正畀以裁釐之權德向為之其選



亦較重矣後世目之蓋以宗法立而成疏別宗正設  
而淵慝分意寓勸懲而一歸之敦睦仁厚而已我  
朝叙親以昭穆親盡則止祿秩適以隆殺科條甚明  
設宗親府擇秩一二品稱君者三人誦有司以御  
批授之誦令庶司禮過宗室而實掌宗人封勉之典  
兼行統率之義事寄與古之宗正同而裁釐之權移  
之宗簿寺此為小異耳曾錄有司者之名為先生案  
亡於兵燹且數十年矣逮 聖上踐祚首起義昌龜  
川為是任二君即府舊基荆廡宇凡百鼎新而又錄  
前人之名成一書如舊案自益陽君以下如千人藏



樂全堂集卷六  
十一  
諸府而徵文于邇聖紀其始末噫宗室不許通籍居  
平無所騁其才智於國家治亂成敗無所當而譬之  
元氣隱然為盤石之重則詩書所稱可以考焉別戚  
疏分洲慝一歸之敦睦仁厚者在古宗正之職而為  
今有司者之事二君之成是書豈非為是也耶詩云  
宗子維城邦國惟寧其庶幾勗之哉

雲谷集序

行到水窮處坐看雲起時詩而禪乎猿抱子歸青嶂  
裡鳥含花落碧巖前禪而詩乎蓋悟者禪而詩亦由  
悟而入其道雖殊造微臻妙一也開士大德不以是



為障必與詞人墨客往來酌唱流傳於世間多矣近  
世雲谷徽公頗有詩名見其集中所載芝峯東嶽諸  
公忘其名位樂與之酬唱則徽公之詩必傳於世無  
疑而第未知其禪而詩者乎詩而禪者乎必有能辨  
之者山人希安彙而錄之智文刻而傳之皆其弟子  
也

清虛堂集序

余早叨貴近跡不出闌闔而山人衲子徃徃逐臭而  
至未嘗不引與之談問其所宗師輒曰西山西山亡  
數十載不接其影響者咸誦其有道難之不能名其



道而亦輒曰西山吾東方之大宗師也余心異之一日其徒葆真彥機謁余以西山遺稿乞一言弁其簡端夫釋氏之道以寂滅為宗簡易為律集其遺文序而傳之其跡太著無乃為西山之累乎有其質斯有其文有其實斯有其名質文名實存而跡不得不著所謂積於中發於外也集而序而傳之者何累於西山也稿中有三夢錄蓋以生滅為夢也其所著即夢中之語集而序而傳之者亦終歸於夢幻爾余從夢中論其跡者庸非夢中夢耶若西山者不待生而存不隨死而亡西山有知余之斯言無亦當其意否是



為序

戴恩堂詩序

余少時見髡而服大夫服而躋門者先君子進之前  
而獎與之頗洽詢所繇進其人跡山林而勤王事捍  
王于艱為上所注有聲於諸公鄉間也後數十年  
而余從家塾剗先集集中有為郭同樞戴恩堂詩  
并有小引曰郭震鄉本山人也法名義巖壬辰之亂  
起兵討賊朝廷嘉其功除職至列卿班仍長髮姬  
妻居殷粟所居堂扁以戴恩表其志云余心儀之久  
矣忽有款閤求見者乃余少時所見髡而服大夫服



躋先君子門者而其顛冠矣其胡且皤矣捐余而進  
一軸即先集中所載戴恩堂詩相與道舊感涕已又  
出 宣廟御製詩二篇洎諸卿大夫賡和之章若干  
問序於某曰陋居之扁實先相國所命而題詩而冠  
之則子不可無一言以列其事余遂返涕而作曰聞  
子之居負望嶽踞巨浸即物選名者何限而以戴恩  
義至曙矣生而得為男子身而耳目聰明才器完美  
如將需于世者而化其父母之身剔其父母之髮竄  
跡山林以世法觀之戾於天常而自絕於為入之道  
矣值國大難巖穴皆起才效器使各奏厥績不限以



地蓋天意也。君人者代天行事者也。苟有才器需於  
時者，雖在山林，必欲還其父母之身長，其父母之髮  
責以人道，叙以天常，服以大夫之服，授以大夫之職。  
者體天之一端，而不欲遽加以威武法令，特降宸  
翰使之警悟，懺悔其施以雨露，照之日月，不遺一物。  
各正性命，蓋覆之大德也。於是復姓受名，畜妻育子，  
宮室而處，耕鑿而食，抗禮衿紳，稱尊鄉井。夫是一髮  
一膚一飲一啄皆宣廟之恩也。則為搆一堂閣，藏  
寶墨，傍桺鄉大夫之什，揭吾先子戴恩之扁，朝夕於  
斯對越天章，退而吟嘯流連光景，逮其桑榆之年，振



策而南徧謁輦上君子日獲瓊琚歸裝暴富而責余  
不佞以一言噫余亦可以言也日月之明也雨露之  
澤也瞽者慕之渴者思之以其獨也囿化之民孰不  
冒浥而拯溺歸正之恩於子為獨此吾先子特揭子  
之堂俾寓不忘之義也子居是堂教子孫永世不替  
及于鄉井州閭風而厲之忠義之士感發作興他日  
緩急勤王事而捍王于艱若子之為則揭堂之義關  
于世教而作堂之效不止於一方而已也

奉先品節序

祠堂成家督冕請余裁定祭祀儀節庶後之遵而行



之者古人不曰祭禮從先祖乎吾家自有奉先之儀  
而一二小節之未備者畧為變通亦先君子志也曰  
語子冕曰凡祭祀以誠為本牲殺猶為末也以敬為  
質拜跽猶為文也然品不節則瀆儀不飾則野其欲  
裁之而貽後者意固善也今之講禮孰不法朱氏國  
俗之不同古今之異宜則不免於家各異禮三代所  
以損益而有不得不變者叅降獻徹從朱氏矣噫家  
國何嘗異哉創成之典必率於陵夷之日吾定吾家  
之禮誰為毀之者吾為是懼

平山申氏姓譜序



惟我申氏出於谷城縣而受籍於平山府自高麗太  
師壯節公始云高麗史以壯節公為光海州人光海  
州即今之春川也府西悲方洞有壯節公墓壯節公  
微時或自谷城徙居光海州轉入北關翊戴麗祖故  
其殉義而死也賜葬於光海州而史氏之傳如此也  
世代邈遠莫可考究而氏族之籍於平山者垂八百  
禩矣名德相禪遂為海東大姓舊有譜牒淪於兵燹  
先君子乃於謫中撰定世譜溯源尋派並收內外枝  
裔手自抄錄藏于家猶為未成之書也翊聖奉諱來  
叙次遺書得世譜執而泣曰此吾先君子所以遺後



人者其責實在不肖遍求同姓之散居四方者其在  
平山者十四家在春川清州安東聞慶仁同義城禮  
安大丘滎川醴泉者亦十數家孰先君子所撰叅以  
諸家之牒專收得姓者為譜名之曰姓譜凡得姓者  
雖女子畢錄之絲是而求之則女子之子孫百世而  
可徵已惟是傳信之書要之簡潔明其本末非厚於  
內而薄於外也醴泉一派亦自有據并附于後噫古  
人以立譜收族猶有宗法遺意可以攝人心厚風俗  
其有關於世道丕矣邇聖承付屬之勤證定編摩八  
易寒暑而始孰剗剗其敢曰不墜先志哉宗丈大司



馬平城公景禎甫聞有是舉出力為費敢書顛末俾  
誌于後

楓巖集序

伯厚氏以楓巖詩樟於鶴城徵余一言引之余不知  
楓巖何時人亦不知其為何人而讀其詩而想其  
人必抱志隱遯者類也夫詩言志觀其志之所存其  
人可知故古人之詩或譬之伯夷或誦為詩史詩而  
藻績不之以徵其志焉則特鸚鵡之能言爾集中古  
體冲澹有趣律法清越簡潔竒僻之境自有造詣之  
語寂寥之音便覺飛動之意如遣興放言諸作可見



其志之所存也以荆軻一篇論元亮心事信不誣矣  
楓巖之詩得余一言於百年之後豈非所謂朝暮遇  
者耶伯厚氏勤求殘簡煨木而壽之其心良亦厚矣  
是為叙

疑禮問解序

月塘翁以疑禮問解示余仍屬序述余未嘗從事於  
斯而亦嘗有意於叩質遂携歸淮上屢閱月而始卒  
業焉蓋翁平居攻苦探索有素其有疑於四禮之變  
者條為問目凡一百三十有一沙溪金先生据古經  
傳若儒先諸家之說逐節而解之問解之際互有發



明要之歸諸至當余每過一解輒開一障盡其卷而  
疑網豁然矣夫治禮猶之乎治法律然其經而常者  
布在方冊可安而行之唯其變者膠轄纏繞而古聖  
賢微辭奧義散在群書未易擇決差之毫釐繆以千  
里譚禮者猝遇之俵俵猶瞽之無相是奚異用法而  
不知法外意也如木之枝如水之派千分萬折有源  
有委本之天理叅以人情自有蹊逕可涉必也躬以  
行之心以求之體其常而攷其變乃可傳信故也七  
十子之徒莫不通其說而曾氏之問獨著于記也先  
生學究雜服至老匪懈搜羅證定反覆論辨榛蕪廓



開轍迹坦正使人由之如旅得歸厥施不已博哉然  
洪鍾之響非善叩不能得從後音容而盡其聲也翁  
之尊尚所聞著此成書為訓於世之驗其躬行之實  
用心之勤矣其聞曾氏之風而作者耶篇末付宋子  
明甫之說可見先生門下多好禮之士也昔張橫渠  
以禮學教其門人程夫子稱之吾知此書之行先生  
之師道益尊顯於後世也已

己卯諸賢傳序

余於壬寅年間得見己卯黨籍一卷摠叙黨禍顛末  
而自靜庵先生以下凡罹文網者立傳有詳畧以其



受禍之輕重而列於錮籍者無慮以百數則一時善類盡之一網矣此書即順興安路所編次而外王父清江李公所叅定也余時稚昧猶能繹以誦之蓋吾高王父社稷署令君為諸先正所推重而曾大父夷簡公少遊於大司成金先生之門禍作之日與太學生朴光佑諸人守闕訟寃以其妙於端楷又能疾書金公魯以諸生造列斂管讓公寫疏洎通籍衆貞餘孽以為黨人而劾之事載金黃岡繼輝所撰碑銘中以是吾家世知黨禍事甚悉嘗聞己卯諸賢莫不以堯舜君民之志講內聖外王之學而其德望重者受



禍深故表章之舉不能無先後也今忠清道觀察使  
金君伯厚以己卯八賢傳問余將欲剞劂而行之世  
余受而讀之既以書復曰甚盛舉也其於化理得所  
先務矣筭當時德望重者受禍深表章之所以有先  
後也伯厚乃執其書頗加去取實遵安氏所編黨籍  
之列又謾諸賢出處事行以流竄削罷革科者太學  
坊民之訟寃者類以別之又有附傳無論貴賤能左  
袒於斯文者咸收錄之遂成一書核而文簡而明無  
餘憾矣吾東方理性之學圃隱文忠公實始倡於麗  
季而遞顯遞晦不絕如線至靜庵先生而適紹寒暄



之緒遡其淵源擴而大之遭遇靖陵不世之知明  
勗勵相拔茅彙征庶幾丕變之化而中影之域潛機  
迅發一時善類殆盡之一網噫千一遘會若將有為  
而兇邪逞憾恣其毒害豈天運不齊一升一降無所  
宰於其間耶公議之定不待百年褒誅之典少洩志  
士之痛則可見其昭昭之靡忒也伯厚當國家板蕩  
之餘膺專省旬宣之任首刊是書以為化民成俗之  
資可謂得其先務矣璐貞愍公之孫伯厚大司成之  
玄孫趾美敦本後先纂輯而余不佞獲從其後以夙  
所誦言者克相斯役其亦幸矣夫



東岳集序

余自幼稔聞先進緒論咸推東岳詩為大家數而吾  
先子嘗謂德水之李自容齋未百年而又出東岳異  
哉余已心識之稍壯得東岳公所著述讀之雅欲執  
鞭顧公與世抹撥徊徨州郡余亦罹罔廢居絕造請  
餘十年所每獲公詩輒忘寢食憇當吾世而失之也  
歲丙寅公從峽纍得賜環歸余馳一騎訪公於郊扉  
公迺大愉席地命酒輸瀉生平遂稱忘年交余逡巡  
不敢當而自是益習於公公之愛士出於天性其所  
傾嚮出肝肺相示不計死生利害於其所不契不少



俊色辭可見然諾之重徃徃酒間揚挖古今意氣骯  
髒時露其奇而譔笑唾罵無非詩者然其一字一句  
搯擢彌日而孰然後知公深於詩道非人所能及也  
高世之行絕人之操之以範俗峻局宏材有大過人  
者而不少需于世雇用其政術於民社所至稱神明  
而綜理微密有陶士行之風豈其詩道亦能旁通於  
吏道哉晚際位遇遂躋宗伯步武文衡屬望方隆而  
公竟謝病不拜自投湖節杜門養痾丁丑以後尤無  
意於世一日盡發其籍示余握手感歎余於公晚合  
乎不可謂不受知也公物而全集始行澤堂公問序



於余噫先進之論已定於公集未行之前無所待而  
自不朽矣後死者誰敢任其責乎惟本朝作人之盛  
莫盛於成宣兩朝即東方聲明熙洽之會英翹林  
林孰不欲各闢堂奧自鳴一家言而歷數兩朝大家  
皆歸於德水蓋其地靈毓秀黼黻一代之文治理固  
然矣以天下之大唯巴蜀踰多產文章士雄褒之後  
青蓮勃興至三蘇挺生眉山草枯為千古盛事容齋  
東岳雖出於偏邦祖孫趾美澤堂後出又主詞盟德  
水之於眉山奚多讓焉此吾先子之所以興歎也公  
自謂少善賦誄棄之治古風涉蹊逕又棄之七言律



景難工用力於斯數十年云是以世之操觚者於公  
律法尤無間然易所謂富有而日新者其庶幾焉公  
諱安訥字子敏容齋相國苻之曾孫澤堂名植太學  
士亦容齋之玄孫實撰定公詩以傳于世

柳川先生集序

林川守韓侯會一民間就余垂淚而語曰吾先君平  
生著述甚富不幸亡於兵火今所撫拾為編者即千  
百之十一不可謂成書猶欲梓而行之得子一言以  
叙之庶乎罪我知我其辭恭其意甚感而數書更僕  
其請彌勤余辭不獲迺愼然作曰凡世之以文章自



鳴者何限而其傳諸久遠垂之不朽不在於簡篇之多寡而况有德者之言乎余不佞以家庭之故獲習諸先進長德而自幼遊白沙李相國之門相國常字先生而謂之曰某甫一世之偉人也及聞諸先進長德之論亦莫不然余則已私識之稚昧不識所謂偉人者何狀雅觀晉史以謝安桓冲為江左偉人常試以二子之跡求之幸而受知於晚際許以通家之誼十數年間得於薰灌者蓋不淺亡論其宏宇遠識自有入所不可及者而處窮達禍福之際屹然不動平居望之嶽峙淵渟崖岸莫測即之盎然和煦與物同



春余於是始知偉人者果如斯而顧乃以先生之德  
考安石公元之績當時特舉其風流志業係望之隆  
而言之若先生問學之博秉禮之正之以範世而敦  
俗有非晉人所可擬者先生而端委巖廊任開濟之  
責則其澤施可易概哉噫先生真一世之偉人也文  
章在先生固是餘事然少年登場一戰而霸操觚而  
當先生之世者咸歛衽而讓其桴鼓天之畀先生之  
德之才可謂全矣其詩若文猶有源之水決而為瀾  
逢陽之柯敷以為華不煩機行繁然成章信乎有德  
者之言也遺編之入梓者雖出於撫拾崑壁隋珠愈



小而愈珍其傳諸久遠而垂之不朽後之讀是集者  
必恕余言之非諛也

公源先生遺稿序

以諸公卿家撰次先德或以銘章或以敘述徃徃見  
屬懼非其任又非知言者逡巡不敢當而顧惟諸公  
皆先朝耆喆即吾先子之所從遊者則輒責以世  
誼誼有所不可拒每當操管怒焉隱中蓋殄瘁之痛  
非獨吾私也尚州金使君光燠與其季光炫千里命  
僕致公源先生遺稿固微一言弁諸卷首翊聖誠亡  
肖既迫於二君之責效不腆之詞狀先生之行又何



敢定先生之文哉辭而不獲遂發其籍伏以讀之不  
覺涕歔歔下也吾先子與先生結髮論交五十年来  
出處伸屈終始一轍壬辰之訏患難與共再被辟召  
同入幕府際昏放廢同桮峽邑其間抒懷舒鬱一以  
詩道發之唱酬投贈遐通勿隔嘗見先子得先生詩  
札珎之悉藏去篋笥記在金陵日行路難一篇貼諸  
壁上而曰此非今人語也編入家集中以傳之亦先  
志也噫世之人能名先生之德而不能名先生之文  
非世之人之不能乃先生不欲以是為名也然吾先  
子以先生詩為非今人語則不可謂世無賞音鍾期



得一伯牙奚多乎哉先生遺稿中更變故放軼頗多  
其文存者尤尠亦足以見其典要自誌簡潔有法前  
後封事意在格王實闡世道古今詩清腴合度詞傳  
於理其出於性情之正而歸於溫柔敦厚者耶是集  
行于世世之人之不能名先生之文者始知先生不  
欲以是為名也若先生之立朝本末殉義大節書諸  
簡策昭揭宇宙茲不敢贅云

### 五峯別集序

五峯集行于世矣其嗣延川公撫其遺餘為別集如  
千卷問序於余蓋將并傳也昔歐陽公居士集先為



刪定其後發棊等更加撰次今所傳歐陽公集是也  
則延川之續編別集非無見也凡文章家數有大小  
小者務精字鍊句衡要以無瑕大家不然瑕不掩瑜  
山川之大者不能無朽壤汚流而望之巖巖而已混  
混而已此其包括之無不有也先生受 穆陵不世  
之遇掉鞅藝苑人以為謫公從 君子艱代草制教  
人以為內相洎乎功成名立致事優游則風流高致  
擬之疏白余小子獲幸於晚際時已大衰而容貌辭  
氣之間侃侃不替嘗伏其雅度而恨不及見其壯也  
及讀其全集益知其所存亡論黼黻王猷翊亮文德



其結撰之法不倍乎古作者而自運機杼錯落竒拔  
雖單辭片言注以精神其合者如嶽峙河決人不可  
狎游則可見其大也別集之編惡可已也余竊嘆延  
川之克紹先緒無讓於歐陽家也延川名景嚴字子  
陵以儒科進秩亞鄉襲封君能世其家云

經世書補編序

夫日月星辰皆天也山川草木皆地也夷狄禽獸皆  
人也聖人作於其間測其度而正之辨其界而經之  
制其品而叙之觀乎陰陽定四時察乎剛柔配四行  
審乎愚智區四民於是而有禮樂刑政而導而齊天



人之理泐然無間財成之迹昭然著見其人則堯舜禹湯文武周公桓文其世則皇帝王霸其事則道德功力其文則易詩書春秋夫子生於堯舜禹湯文武周公之後不得其位則曰其文而述其事誤其人而論其世而立人極焉其後聖人不作禮樂寢微雜霸興而亂賊滿則致夷狄之禍胥淪於禽獸之域至宋而濂洛諸子出而講堯舜禹湯文武周公之道而又不得其位或誨人而明道或著書而垂訓而堯夫先生之書以運經世則揭消長之理緣理証事易書之義也以會經運則嚴尊卑之分以分示法詩春秋之



旨也可以詔世可以存世可以憂世可以律世大哉  
書也叅四經撫十六代史勒成一家言而日月星辰  
復正其度山川草木復經其畧夷狄禽獸復叙其品  
天地之始終人事之得失如指諸掌而其書止於北  
征契丹即夫子刪書而繫秦誓之意也先君子之學  
得於先天畱推演象數作先天窺管行于世矣嘗謂  
吾東方檀君與堯並世箕子肇封於周三韓以降治  
亂興廢畧與中國相為表裡至於本朝衣冠文物  
足以進於中國以東史編入於經世書則抑一盛事  
也小子不敏雖不能紹先人之業亦不敢墜先人之



志也竊觀邵氏書起自月之巳星之癸辰之子止月  
之午星之壬辰之酉不撥孤陋猥以其法引以長之  
編其運世自建隆庚申至洪武戊申星之癸辰之亥  
其明年乃星之甲辰之子則天道鼎革而人文再朗  
掃胡元之腥穢被華夏之聲明 聖祖受命又在於  
壬申蓋屬大運否極而泰也按宋元史提綱舍目倣  
邵氏之舊而繼書之東史記自檀君戊辰止高麗恭  
讓君之辛未而畧於遼古詳於近代入 本朝祗据  
攷事撮要紀年書其大事而不為筆削者嫌於野史  
也上下數千載間搜訪考訂六七年而後稍得裒緝



又遭丙子之難收拾於江都灰燼之餘携歸淮上非  
病故輒手自編摩凡十閱寒暑三易稿而始成書其  
用力不可謂不勤而紕繆之誚僭越之誅知不可追  
矣或云元會運世之數何所原而起也蓋取時日月  
歲加倍而窮之以此範圍天地日月星辰山川草木  
夷狄禽獸不能違其數也何以係之以史也日月星  
辰之行于天山川草木之列于地無非人事也皇帝  
王霸道德功力無非天道也係之以史可以見天人  
之理沕然無間財成之迹昭然著見也然則邵氏之  
學何學也邵氏焉不學要其歸易也其為易非世之



所稱周之易也乃邵氏之易也世之人見卦畝曰羲  
之畫也絲文曰文周之文也彖象曰夫子之辭也神  
而異之若不可究雖無畝無文其理已具即事而察  
理即理而起數非有他術也程子曰堯夫差法冠絕  
古今又曰內聖外王之學也余既成此書慨然嘆曰  
制禮作樂聖人之極功而依其法而肆之祝史伶人  
咸能通之余小子之敢於操筆為邵氏役者能不為  
僭亦不為僭也

菴菴稿序

通人權汝章當 穆陵朝負高蹈之行以詩酒自豪



意不可一世士而獨稱子深古風推許頗至子深遂  
棄博士業從汝章游人皆高之汝章竟以詩案死於  
非命子深落拓自廢然其嗜飲攻詩益甚暨 聖明  
改玉徵巖穴之士子深從田間起家十年間至郡守  
年已屆七袞矣不樂仕宦栖遁於湖海之濱一日策  
羸入城訪余居把酒道舊故其鬚髮皓白而膚充氣  
完言語肫肫神觀怡悅豈所謂嗜慾淺天機深者非  
耶發其所為菴稿者讀之蓋多讀漆園書會其歸  
趣其古詩源於老杜而上泝陶謝殆非近代操觚者  
所可及律絕樸茂饒格力亦非開寶以後語也余於



是知汝章取士不以皮相而鑑識之精也後之觀菴  
菴稿者是以知子深之為人亦徵余言之不妄噫汝  
章不可作矣而子深且老矣居然有人代之感遂撫  
卷三嘆而題之

成謹甫集序

沈德輝博雅好古人也能譚說故實尤詳於本朝事  
每疊疊言乙亥革除年間興廢之迹未嘗不感慨係  
之矣一日以成謹甫遺集一冊示余曰此冊經許多  
喪亂猶不湮沒即一奇事行欲翻刻以壽其傳子其  
叙之余乃考其刊行者姓名出於無聞之一冗官且



不紀歲月意是冗官必自沈晦不求聞於當世者尤  
可異焉噫不泯者天理難謔者人事天人互相勝負  
而消長之理見焉惟我英陵將天縱之聖貽燕翼  
之謨豈不周且慎矣而六臣者受心膂之寄其報效  
於倉卒不啻軻政之餘謀豈不知成敗利鈍而敢於  
倒行而逆施者天命既有所歸永嘉操其柄上黨運  
其籌高靈河東之鱗翼已成雖有機衡不能容其間  
矣其志祇在捐軀殉義酬先王之恩明不貳之心而  
已於乎戚矣謹甫於六臣中尤有盛名光廟必欲  
臣之以定一時之人心有類乎永樂之欲用方正學



草詔之意爾曾見東鶴寺死簿諸成無論少長俱糜  
於膏斧之下亦類乎方氏之十族旣不能生致其用  
則用重典以震疊之雖以人力勝而南岡之纍纍猶  
能識其姓氏以別之謹甫此集至剗刷而傳之天理  
不泯猶閉閤微陽闖發於地底也噫永嘉上黨諸勲  
貴繼有一時之烈不有六臣者培其義而樹其節則  
何以揭大東之日月而維數百年彝常哉 英陵之  
寵待六臣高皇帝之以異人稱方正學者俱留為扶  
綱立紀之地聖神同符非人之所可測也彼諸勲貴  
亦各自有文章黼黻於一時而至于今或傳或不傳



不免為鼠蠹之餘誰能欣慕激賞於數百年後必欲  
壽其傳如謹甫之寥廓小集哉余觀此集竊有感於  
天人之際且嘉德輝好古尚德之志謹書顛末為序

疑禮問解序

沙溪先生所定四卷

邇聖聞沙溪金先生門下諸君子撰次遺文而論禮  
之書甚備將大行于世云一日先生之孫益熙氏以  
疑禮問解授邇聖仍致其仲父承旨公之意曰願有  
述也自惟少而失學老矣無聞固不敢相斯役而夙  
荷眷顧之恩不唯以堂從之懿則誼不敢辭就加卒  
業而曰為不刊之書也夫六藝之科禮居其先三千



三百布在方冊而七十子之徒習而通之者即權輕  
重隆殺之節盡常變不齊之事合于天理人情焉而  
已然非聖人決疑於曾氏之問何以為訓於萬世乎  
吾東方漸被同文之化蔚有禮義之稱而國俗局於  
隘陋安於苟簡禮之經者寢寢乎其未純惡能制其  
變而合于經也惟我先生學究雜服凡自三古以降  
質文之可考者芻求博訪証正剖析用力積久豁然  
無碍人有扣質應之如洪鍾符之如左券實契聖賢  
問答之微旨則講禮之精且專未有如先生者也是  
以門下之士薰灌德業咸能速肖尊信師道有此成



書此書一出朝野必將相率而由之一洗隘陋之習  
免於過不及之失茲實不刊之書也當配之學官傳  
諸無極於乎盛矣夫

韓山李氏族譜序

余每疑人不能名生民之祖而歷千百代得一人有  
功德於世者尊之曰鼻祖別其族而修其譜則不幾  
於子孫揀擇祖先之賢否而尊之也有功德於世則  
能亢其宗而庇其族矣亢其宗則千百代之祖皆享  
其榮矣庇其族則千百代之祖之孫皆受其福矣尊  
之為鼻祖又奚疑焉洎閱韓山李氏之譜余之所嘗



疑者益釋然矣我東方素重世族羅之六部麗之六  
太師之裔冠冕海東其餘著姓之可譜者亦皆閱閱  
而韓山之籍肇於麗季圭組相襲蔚為名家攷其譜  
之尊而祖之者稼亭先生也稼亭一傳而為牧隱先  
生則非所謂亢宗庇族者耶以一人之遺分派內外  
不知其幾千百而麟齋陰崖趾美著節能世其德名  
鄉聞人代不絕書而作相者幾人此唐宋史筆所特  
書者則是譜之行不亶行於鄉邦而且登於國牒矣  
其裔孫觀察使德洙甫曾宰昇平重剝牧隱全集布  
於世按嶺東又刻世譜問叙於余余嘗讀牧隱先生



書猥謂知先生於數百載之上有時掩卷而發嘆也噫先生以七尺眇然之身當五百垂亡之運發其不敢發之言支其不可支之勢豈不知興廢之數而其所以為若是者特不欲變其志爾不變其志而死雖不得於人宜得之於天天之報施之微於斯譜

畸庵稿序

子容發其籍示余余乃卒業而嘆曰子容可謂老於文學者豈可以易言乎哉子容夙遘家難退然自廢專心墳素積有年紀質疑師門識解精博於古今書無所不涉酷嗜騷選韓杜沈潛飲沃翕取敷施其為



賦誅憾慨惻有騷人之致書疏宏贍典密詩道蒼  
深豪健其不合於古人機杼者鮮而絕無今人剽竊  
蹈襲之疵要之多積薄發兼能專美焉則所謂老於  
文學未可以易言者非故夸也世之人見子容之文  
目之以文章士文章即其煨粕耳子容豈唯文章士  
哉當其盛年被敲撼而畸於世歛其磊落俊爽之氣  
魁傑拔俗之才一託之觴詠鳴其不平而已晚而始  
起猶不能展厥所蘊駸駸乎暮境子容之不遇於世  
耶世之不遇也噫

龜谷詩集序



詩猶禪禪由悟入詩貴神解頓漸皆教門徑自殊唐  
宋皆詩調格自別當吾世而祝髮者何限操觚者亦  
何限未聞有能悟入能神解豈有之而吾未之聞耶  
吾得一人於賤者之中為學而近於禪為詩而近於  
唐必曰悟入而能神解也噫之人之詩可以力取則  
已為貴勢有力者所奪久矣造物者哀其窮且賤而  
以是鳴之耶余嘗評其詩曰古體酷肖六朝歌行出  
入唐諸家律法長慶以前語也世人必疑於李後之  
具眼者能辨之詩卷冠以龜谷崔姓名奇男云




樂全堂集卷之六

[Faint vertical text columns, likely bleed-through from the reverse side of the page]











所

全

樂

三